



ol piksa
long pes 16

RABAUŁ I GURIA

Tupela strongpela guria moa i mekim save long Rabaul long Julai 14 na Julai 26. Inap nau Rabaul i guria i guria i stap. Planti manmeri i pret tru. Planti waitman i kisim balus i ranawe. Planti samting i bagarap moa, tasol i no bagarap long guria. I bagarap long bikpela si i wilwilim ol haus na ples. Rabaul i karamap long wara.

Bikpela guria i kirap aninit long solwara long hap i go long Buka. Na olsem bikpela si tru i sanap i paitim Rabaul nogut tru. Si i go i kam inap sampela aua olgeta. Ol bikpela rot na stua i pulap long wara.

Na ol samting i guria i go i go. Wampela man i kaunim inap 90 guria. I gat planti manmeri ai bilong ol i raun na ol i laik traup long dispela ol planti guria tumas.

Tasol i no gat wampela man indai. Sapos kain guria olsem i paitim Sydney, man bai planti tausen manmeri i lus.

Wampela Tolai meri na tupela pikinini i wokabaut long rot na dispela namba wan guria i painim tripela. Wampela maunten olgeta i kapsait tasol i no karamapim tripela. No-gat. Maunten yet i karim ol i go na tromeim tripela long solwara. Wampela man i painim ol.

Wampela sip "Moisana" i sanap long nambis bilong Rabaul. Guria i wokim draipela hul stret long nambis, sip i pun-daun insait long en na nau yu ken lukim antap long mas bilong en.

Namba wan guria i mekim save tru long rot klostu long Raluana na long Gaulim tisa trening koles.

Bikrot i bruk nabaut long planti hap na wil bilong ol ka i no inap ran long en.

Biksi i kam insait long ol stua na hotel long Rabaul.

Ailan Matupit, as ples bilong ol Mataungan, i no gat man i stap long en moa. Ol i kam long bikples. Ol guria i pinisim rot i go long Matupit olgeta. Ol man i swim na i wokabaut long wara i kam. Ol i slip long ol haus sel insait long sampela pak long Rabaul. Ol man i pret nogut Matupit i pairap.

Nau ol man bipo i pait wantaim ol plisman, nau ol i pren tru, long wane-ol plis i ran i kam long helpim ol.

Long taim bilong guria planti man i longlong nabaut. Telepon i no wok na ol man i wetim tok long redio, tasol i no gat. Planti man i ting em redio stesin tasol i ken mekim gutpela tok tru long taim nogut olsem. Em i ken strongim bel bilong ol man, givim gutpela skul long ol.

Ol piksa na stori hia i kam long Wantok ripota Steve Simpson.



Guria i kirapim bikpela si tru. Hia yumi lukim Mautpit Ailan long taim bilong biksi na taim bilong draiwara. Olgeta pipel i lusim ailan pinis.



PAS I KAM LONG EDITA

Sapos yu gat tok yu raitim sotpela tasol. Sapos yu raitim longpela bai mipela i sotim. Yu mas raitim nem bilong yu tru long olgeta pas i kam long mipela. Sapos yu no laik mipela prinim nem bilong yu tru, orait yu raitim arapela nem bilong yu tu.

Sem Long Ol Wantok

Dia Edita.- Mi wanpela boi bilong LabLab skul. Mi laik tok save long sampela wantok ol i bin kisim save long skul bilong misin. Long taim ol i kamap long haiskul, ol i go long bik graun. Ol misin i save salim ol nating long bot bilong ol na go long Lae. Long taim ol i kamap long taun ol i lukim ol kain kain samting ol i no bin lukim bipo. Nau ol i lusim tingting olgeta long misin. Ol i tromaom misin olsem wanpela bun bilong pik na pis. Ol meri i go long nes na ol man i go long kuskus, tisa, redio anaunsa na ol kain kain wok.

Olsem wanem? Ating yu lusim ting olgeta long ples yu kisim save long en a? Ating yu seksek

long kisim mani tasol? Tasol mi tokim yupela sapos yu kamap long Siasia Ailan bai mi tokim yu stret bai yu gat bikpela sem moa long ol misin na ol bikpela man long ples. Ol nes yupela traim na ting liklik long haus sik bilong yumi long Siasia, hat na longpela klos na sendol i bagarap o nogat?

Yu husat man bilong Siasia sapos yu ritim dispela pas ating yu nogat sem, tasol mi bai i gat bikpela sem tru na liklik taim mi ranawe long skul bilong mi.

Em tasol sapos yu laik bekim pas, tromaom tasol long mail bek bilong Wantok na salim i kam.

Nelson Aigua
Lablab, Lae.

No Bagarapim Nem

Dia Edita.-Sampela man i save rabisim sampela dipatmen long taim ol i raitim nius. Ol i toktok olsem long ol tisa na medikol i rabis long wok bilong ol. Olsem ol wantok na ol pren, dispela pasin i no stret ol pas yu salim i go na olgeta man i ken ritim. Yu ken go na tokim stret long het tisa na man i bosim haus sik long ol wan wan distrik. Bambang ol i ken stretim ol dispela man i no wok gut. Tasol yu ritim long nius em i no stret. Long wanem ol sampela long ol em ol i wok gutpela moa na ol i

traim hat long helpim ples bilong yumi Papua Niugini.

Yes, ol pren mi yet mi ting na mi toktok na rait wantaim. Tasol em isi tumas long mi. Tasol mi laik traim long wok, em i hat tumas long helpim.

Sapos yu rait yu i mas helpim narapela na narapela i mas helpim yu. Em i gutpela pasin bilong helpim waitman na blakskin long Papua Niugini i kamap strong.

J.K. Himup

Wewak

Spakman i Pik

Dia Edita.- Mi laik bekim tok long kranki tingting bilong tupela pren ia, L. Kacgaga na S.T. Luke, long las niuspepa Wantok namba 23.

Tupela i tok ol wan-skin plisman i save mekim nogut long ol, olsem pik na dog. Mi no wanpela plisman i bekim dispela tok, nogat. Mi wanpela boi long Angoram, na mi gat bikpela kros long dispela kranki tingting.

Ol plisman i save bihainim oda bilong helpim sindaun bilong yumi. Yumi yet i save dring

planti na longlong olsem pik na dok. Orait ol tarangu plisman ol i save kam long stapim yumi. Ol i save bel kros sapos man i bikhet na i no laik i go isi long wanem em i longlong olsem pik. Sapos yu dring, yu mas dring olsem man i gat tingting. Yu no ken pulimapim olsem kau. Em bai yu spak nogut tru na statim trabel. Ol pik i save dring na spak. Tingim gut ol brata. Nogut yu olsem pik na dok taim yu dring.

Alphonse Paul Mai
Angoram

No Tok Nating

Dia Edita.-Sori mi Joseph McArthy i pilim wanpela pasin i no stret long het bilong mi. Joseph McArthy i laik autim tingting bilong em long hap tok olsem: moa gut ol man i no ken toktok strong long hap tok i go olsem: Marimari, na laikim ol narapela man olsem, yu laikim yu yet.

Yumi kristen yumi mas go pas long ol rabisman. Na mi tu mi wanpela

kristen, tasol mi save harim hap tok olsem. Marimari na laikim. Tasol yumi mas soim tru. Yumi mas givim samting long ol rabisman na laikim narapela, bambai olgeta manmeri pikinini i ken lukim. Toktok nating i no gutpela long maus bilong yumi. Mi amamas sapos yu husat man o meri i bekim dispela pas bilong mi.

Joseph McArthy
St. Mary's Nutuve

Mi Amamas Tru

Dia Edita.- Mi no gat samting tasol mi laik tok amamas tru long Wantok. I gutpela mipela i ritim ol samting na autim sampela tingting bilong mipela. Na liklik tok bilong mi hia. Mi laik autim bai gutpela sapos laik bilong Edita ol i ken prinim. Tasol

sapos i no gat, mi no gat tok. Tasol bai mi amamas tru sapos ol man i ken ritim bikos mi pilim olsem planti katolik man i lukluk long lotu olsem i samting bilong ol waitman.

Peter Rapa
Hoskins

Watpo Planti

Lotu

Dia Edita.- Mi laik kirapim wanpela nupela tingting na tok save i go long olgeta man na meri. Mi wanpela katekist bilong Katolik Misin Kuruk insait long Westen Hailan Distrik.

Mi lukim planti ples long Niugini ol man, meri i resis long lotu bilong God. Mi lukim sampela ples i gat haus lotu bilong Luteran na Katolik i stap klostu. Orait mipela i no resis long mekim lotu.

Yumi laik wokim haus lotu, orait yumi mas bungim mani na wokim wanpela lotu tasol. Ol Luteran Misin i go lotu pastaim, orait bihain Katolik Misin i go insait long lotu.

Yumi resis long mekim

lotu em i no stret. God wanpela tasol i stap. Olsem yumi wokim wanpela haus lotu tasol. Mi lukim olsem Baibel i wankain na ol stori i stap long Olpela Testamen tu i wankain.

Mi laik yumi wokim wanpela haus lotu na ol Katolik ol i ken beten bilong ol yet, na ol Luteran tu ol i ken beten bilong ol yet. Sapos yupela ol Lida bilong Misin yupela i pilim i no stret, orait plis rait tasol i go long Wantok Niuspepa. Sapos yu husat man i laik skurim tok bilong mi, em i gutpela tu.

William Dui

Kuruk (Mt. Hagen)

Laikim Pangu

Pati

Dia Edita.- Mi kaunim nius na lukim planti pati nau kirap long teritori. Nau mi wari long dispela. Sampela pati i kirap long teritori stret, na sampela pati i kirap i stap long arapela kantri, na ol i bringim dispela pati i kamap long teritori mekim nupela pati gen.

Namba bilong yumi pipel bilong teritori i no winim sampela kantri, nogat. Ol i winim yumi. Watpo yumi kirapim planti pati na brukim ol pipel bilong teritori i go pel bilong teritori i go liklik long memba long ol pati? Em i no stret. Sapos yumi kirapim 3 o 4 pati em i orait long dispela kantri bilong yumi. Bai wanem pati i kisim planti memba em i win long mekim lo long yumi. Na planti tumas i kamap olsem resis, na we stap kaikai bilong en?

Olsem wanem yumi lusim Pangu Pati na yumi memba nabaut? Pangu Pati em pati bilong Papua New Guinea stret. Arapela pati i no bilong dispela teritori.

Yumi no ken memba nabaut nabaut long olgeta pati. Yumi mas kaunim gut toktok bilong dispela pati, em bai i helpim yumi long wanem kain samting. Save gut long dispela pati pastaim orait memba long en. Mas ki long memba nating nating.

Skelim gut toktok bilong olgeta pati pastaim na yu ken memba. Bai dispela pati i gat planti memba na i ken lukautim yumi tu long sindaun bilong yumi.

Mi ting Pangu Pati em i namba wan pati bilong dispela teritori. Yumi mas memba. Plis...

Maya Michael
Lae

Lukaut Long Pas

Dia Edita.- Mi lukim wanpela samting i no stret long ai bilong mi, na mi laik toktok liklik long en. Mi lukim long sampela man o meri. Ol i save kisim pas o leta, bilong arapela man na ol i no save. lukautim gut, na bringim stret. Sampela i save karim leta bilong pos ofis na ol i no save go na putim stret long pos ofis. Ol i save lusim. Na sampela gen ol i save kisim leta i kam long pos na ol i no save bringim stret kwik long dispela man, adres bilong em antap long dispela pas. Ol i save larim long haus bilong ol i stap long sampela wik moa.

Em mi ting em i no stretpela pasin. Mi yet

~~Mi laik~~ long ai bilong mi long tupela marit i bin kros long wanpela leta. Na bagarapim na tromoim long ren na tu tupela i opim na ritim ol toktok insait. Dispela mi ting i no gut tumas. Lukim baksait bilong leta. Nem bilong husat i stap. Bringim stret long em. Samting bilong yu em i bilong yu. Samting bilong arapela em i bilong em. Sapos yumi mekim gut long samting bilong narapela bai ol narapela i laik mekim gut long ol samting bilong yumi tu. Em i luk olsem yu laikim ol narapela olsem yu laikim yu yet.

Kateket Andrew Kase
Manus

Em hia nem bilong ol sampela arapela manmeri i bin raitim pas i kam tasol sori, i no gat inap ples bilong prinim.

Mipela i tenkyu long:- Andrew Mattlia (Port Moresby), Frank Jambiake (Kairiru Ailan Wewak), Pius B. Gerry (Wewak), Zachary Jack (Wewak), Rembi Miamba (Wewak), Frank Baraku (Wewak), Zachary J. Kambia (Wewak), Johny H. Naol (Unea Ailan), Agatha W. Galma (Mt. Hagen), Freddie John Wafingien (Lae), Lukas B. Bria (Mt. Hagen), Susana Kasa Mt. Hagen), Alphonse Kagl (Chimbu), Maxwell Maniworo (Wewak), Andrew Wangusase (Wewak), Ludger Mondo (Madang), Samson Joe Bambu (Madang), Joseph Léo Wangikia (Wewak), M. Roly (Manus),

Boom Jack Torry (Wewak), Paul A. Kawage (Madang), Joe H. Undaudrey (Wewak), Moses Sap (Madang), Willson Sparkson (Wewak), H. Beles (Madang), Melchior L. Sane Ajora (Sepik), Thomas Sirip (Manus), Hendrick Wai (Goroka), J.A. Kaulj (Wewak), M.S. Nellsu (Rabaul), Isaac A. Mondy (Lae), Paul M. Nyarur (Wewak), Anthony Waure (Chimbu), Ema-mbra Busman (Madang), G. Awasa (Lae), James Lombui (Ambunti Sepik), Olaf K. Sarum (Wewak), Melchior Saw (Angoram), Michael U. Serero (Madang), E. Noal (Mussau Manus), Wendi Lavuk (Madang), Uma Iyagun (Port Moresby), William Dui (Mt. Hagen), Melchior S. Mendjuopi (Madang), Francis Dama (Rabaul), William U.

INSAIT LONG OL POLITIK

(I KAM LONG NEW GUINEA NEWS SERVICE)

Japan Laikim New Guinea

Inap nau Australia i putim bikpela mani moa insait long Papua New Guinea bilong mekim go het kantri. Tasol bihain long independens, Australia i no mas lukaut moa long mipela. Independens i min, mipela i bikpela pinis, mipela inap pinis. Olsem yumi no ken ting bai Australia i mas salim oltaim oltaim bikpela mani i kam long yumi. Nogat.

Orait. Bai yumi kisim mani we? Gavman tu i save long dispela wari. Na em yet i stiaim yumi bai yumi skul long hangamap moa long ol kantri bilong Asia. Tude i no gat planti kantri bilong Yurop na Amerika i laik putim mani insait long Papua New Guinea. Bilong wanem? Bikos ol kantri hia i pret, nogut bihain long independens bai ol samting bilong ol i lus, o bai kantri i no go het i go daun tasol. Ol i lukim pinis planti taim long Afrika.

Wanpela kampani tasol bilong Yurop i putim bikpela mani insait long kantri. Em Conzinc Rio Tinto - em bikpela kampani hia i mekim wok kopa long Bougainville. Bosman tru bilong en, em ol Englan tasol.

Olsem mi tok pinis, gavman i lukim ol dispela samting na olsem em i stiaim kantri bilong yumi bai i pren wantaim Japan na ol sampela arapela kantri bilong Asia.

Toktok Wantaim Japan

I no longtaim i go pinis Direkta bilong Tret na Industri, Mr. Thompson, na Direkta bilong ol wok Didiman, Mr. Conroy, wantaim tupela saveman bilong gavman bilong Australia - 4-pela hia i go long Japan. Ol i sindaun toktok wantaim ol bisnisman bilong

Japan bai ol i kam long New Guinea na statim kain kain bisnis. Dispela ol bisnisman i bosim ol kampani i gat planti mani, na ol i redi long kirapim planti nupela bisnis.

Wok Timba

Inap nau ol Japan i mekim wok somil o wok timba long hap bilong Madang klostu long Wara Gogol. Wanpela kampani bilong Japan, nem bilong en Honasu; i mekim dispela wok timba. Bihain liklik bai em i givim wok tu long samting olsem 4,000 lokal pipel. Kain pasin bisnis olsem i save winim mani long kantri na givim wok long planti man.

Narapela bikpela wok timba bilong ol Japan em i stap long hap klostu long Rabaul, long ples Open Bay na Wide Bay.

Japan wantaim Gavman, tupela i stretim tok nau long wok timba tu long hap bilong Vanimo long Wes Sepik District.

Ol Japan tu i kirapim wanpela bikpela wok bilong painim ol bikpela pis ol i kolim atun. Ol i wok wantaim wanpela kampani bilong Australia. Ol i save lukautim ol atun long hap solwara klostu long Kavieng na Manus. Ol Japan i ting i gat planti pis moa long dispela hap na ol i baim pinis wanpela smolpela ailan klostu long Kavieng na ol i

Ol Filipin

laik wokim wanpela faktori. Ol atun ol i smokim pinis, bai ol i salim i go long Japan. Na ol atun ol i strongim long ais, bai ol i putim long ol stua bilong New Guinea. Ol i skulim tu ol lokal pipel long mekim olkain wok insait long dispela bisnis.

Na i gat sampela man tu bilong Filipin Ailan bai i kam wok long New Guinea. Samting olsem 100 bai i kam skulim ol New Guinea long pasin bilong ranim ol bikpela buldok na trakta bilong wokim na stretim ol rot. Bai ol i skulim ol draiva long Goroka, long banis bilong Dillingham Kampani. Katolik Misin long Rabaul bai i gat sampela tisa bilong ol Filipin Ailan. Bipo ol i stap tu long Tisa Trenning Koles long Mt. Hagen.

Kantri i laik go het i mas gat saveman i kam insait skulim ol lokal pipel. Tasol ol saveman i kam long Anreika o long Australia i mas kisim bikpela pe moa. Ol saveman bilong Asia i no save kisim pe antap tu mas. Olsem Papua New Guinea i mas lainim wok wantaim ol Asia.

Developmen Beng

Papua New Guinea nau i memba bilong Developmen Beng bilong Asia. Em i putim sampela mani i go insait. Tasol em i ken kisim planti dinau mani tu taim em i laik mekim sampela bikpela wok. Na ol arapela memba bilong

Beng i tingting tu long helpim kantri bilong yumi.

As tingting bilong ol dispela pasin bilong singautim ol bisnisman i kam kirapim wok insait long kantri bilong yumi, em hia. Yumi mas winim inap mani long ranim kantri bilong yumi. Ol kantri bilong Asia i klostu na i gat planti saveman i no kostim planti mani. Na sampela kantri olsem Japan i gat planti mani i laik putim insait long banis long kantri bilong yumi. Bai ol i skulim yumi tu. Watpo yumi no singautim ol i kam?

Yumi Bilong Asia

Gavman tu i ting olsem. Gavman i save kantri bilong yumi i wanfamili bilong ol kantri bilong Asia. Planti man hia i wanskin bilong yumi. Planti i wan tingting. Watpo yumi no kisim moa save long ol? Ating bai ol politik bilong yumi tu, i go bihainim pasin bilong ol? Husat i ken save?

Ol pipel yet i ting wanem? Em i gutpela o nogat?


Prais I Go Antap

Prais bilong bensin i go antap inap 1.5 sen long wan galen.

Mista Oala Oala-Rarua i tok, long ol bikpela taun bensin i kostim 39.5 sen long wan galen.

Long ol hap i longwe long nambis, prais i ken go antap inap 84.5 sen long wan galen.

OLGETA HARIM GUT!



Dispela sop pauda, ol i kolim "COLD POWER" i nambawan tru. Em i wasim na rausim tru ol kainkain pipia long ol klos bilong yu.

Dispela sop pauda i gat wanpela kain strongpela marasin long en i save mekim save tru long rausim ol kain pipia – long ol klos.

Yu ken usim wara long tang or long wara nating. Dispela i kol wara. Sop "COLD POWER" i strong moa na i ken rausim ol pipia long klos bilong yu.

Hoskins Palm

NUPELA BISNIS

Ol stori na poto long dispela tupela pes i kam long Josef von der Haar, em i ripot long Wantok niuspepa.

Long namba 14 de bilong mun Julai Minista Barnes bilong Australia i bin opim wanpela welpam faktori klostu long Hoskins long Wes Nu Briten. Ating sampela wantok bilong yu i go pinis long Hoskins na ol i wokim bisnis bilong welpam nau. Tasol ating, yu no save gut long dispela bisnis. Orait, mi laik toksave liklik long dispela na yu ken lukim sampela piksa tu long en.

Long yia 1967 Pita Simogun bilong Sepik wantaim sampela narapela handet man bilong Papua New Guinea i baim aplikesen na i pilai bilong winim wanpela welpam blok long Hoskins. Long dispela yia yet gavman wantaim kampani Harrison and Crosfield i kirapim wanpela nupela kampani, nem bilong em: Nu Briten Welpam Kampani. Dispela kamapni i wok long planim welpam inap long 24,000 eka. Kampani bilong Harrison and Crosfield i kisim 10,000 eka na em i mas wokim wanpela faktori bilong wokim wel. Gavman i givim 14,000 eka i go long ol man i laik kisim welpam blok. Gavman i kirapim dispela bisnis bilong helpim Papua New Guinea i ken go het.


Orait, long yia 1968 Pita Simogun i winim wanpela blok inap long 15 eka. Em i lusim ples bilong em na em i kamap long Hoskins. Pastaim em i wokim wanpela haus na gaden, bihain em i katim bus na planim welpam. Nau em i singautim famili bilong em i kam. Nau em i sindaun long dispela nupela ples ol i kolim Kapore.

Inap tripela yia Pita i mas mekim dispela wok. Tasol gavman i save helpim em long wok bilong em. Long wanpela wanpela mun Pita i ken kisim dinau long gavman. Tripela yia i go pinis nau ol welpam bilong em i karim pikinini. Na long mun Julai 1971 faktori i stat long wokim wel na Pita i salim ol prut bilong welpam i go long faktori. Nau em i winim mani na em i ken bekim ol dinau long gavman. Tasol hamas mani em i ken winim long wanpela yia? - Sapos Pita i save wok hat na welpam bilong em i kamap gutpela tru, orait, em i ken winim inap \$280 long wanpela eka long wanpela yia. Em i bikpela mani liklik.


Ating Gavman na Kampani tupela i mas helpim ol fama hia bai ol i sindaun olsem wanpela pipel. Mi gat wari long dispela.

Na ol misin tu i gat bikpela wok long ol fama. Bikos ol i kam long olgeta hap, bilong dispela i gat planti kain kain lotu insait long ol ples. Lotu i wok long wanem saming: Lotu i mas wok long soim rot long olgeta manmeri, bai ol i brata na sista. Lotu tu i mas helpim ol pipel bai ol i ken painim yuniti. Sapos ol fama long wanpela ples i laik kirapim wanpela haus lotu, ating i gutpela saming ol i bung wantaim na ol i wokim wanpela haus lotu. Ating haus long i mak bilong yuniti.


I gat wanpela rot tasol bilong painim yuniti. Olgeta i mas bung wantaim, ol pipel wantaim gavman na kamapni na misin.



Mosa Wel Pam Faktori long Hoskins.



Em hia wanpela hap bilong Wel Pam Faktori long Mosa Plantésin.



Asbishop Hoehne bilong Rabaul i blesim nupela faktori.

Politik Edukesen

Em i hatwok liklik long painimaut ol pasin bilong ol tumbuna, taim ol waitman i no kamap long New Guinea yet. Bipo i no gat man i save rait na olsem planti pasin na lo bilong ol i lus.

Yumi save pinis em i pasin bilong nau na bipo tu, klostu olgeta man-meri bilong Papua New-Guinea i save sindaun wokim haus bilong ol long wanpela ples. Long Hailans tasol wanpela wanpela i sindaun long gaden bilong em. Bipo ol man bilong wanpela ples i go lukim ol man bilong narapela ples sapos em i laik pait o sapos em i laik senisim kaikai tasol.

Wanpela wanpela ples yet i gat liklik gavman bilong em yet. Sampela ples i gat kukurai o hetman o wanpela bikpela man i bosim ol. Em i sa-

ve tumas long ol lo bilong bipo na long strafim ol man i kalapim lo.

Long sampela ples wanpela lapun saveman i bosim ol. Em wantaim sampela arapela lapun i wokim ol lo na i kotim ol man i brukim lo; na tu i gat pawa inap long strfim ol man nogut.

Kain lain lapun olsem i save tumas long ol lo bilong singsing, bilong marit, bilong planim gaden, bilong katim skin bilong ol yangpela man-meri, bilong wokim ol kain kain singsing bilong mekim gaden i kamap gutpela.

Ol lida bilong bipo i save lukaut gut tumas long ol pipel. Sapos ol man i no laikim wanpela hetman bilong ol, long sampela ples ol inap mekim narapela. Tasol long planti ples ol tambaraman i holim pawa

Komiti Lainim

Long mun i go pinis, memba bilong Haus Asembli bilong Kikori Open, Mista Tom Korea, wantaim ol tripela arapela memba bilong Haus i bin lusim teritori i go long Malaysia.

Ol i komiti bilong glasim na lukautim graun na ol kain kain bisnis long Papua New Guinea. Haus Asembli i makim

na ol man i pret long ol.

Long taim bilong ol tumbuna, ol lida i save telimautim ol nupela lo long ol pipel bilong ples. Ol i kibung i na sapos ol pipel i gat tok, orait ol inap autim tingting bilong ol.

Olsem yumi lukim dispela pasin bilong ol pipel i insait long gavman, i bung wantaim long bosim ples - em i pasin bilong bipo tru long Papua New Guinea.


dispela lain komiti, bilong painimaut ol gutpela we bilong helpim ol fama long mekim bisnis bilong ol i go het gut.

Dispela komiti i gat 4-pela memba na Mista Uroe bilong Rigo-Abau Open i siaman bilong ol. Inap tupela wik bai ol i stap long Malaysia na lukim ol pipel long dispela hap, long wanem kain pasin ol i save yusim graun bilong ol long ol kain bisnis.


Mista Korea i tok, long mun i go pinis dispela komiti i bin go raun pinis long lukim ol fama i save planim na lukautim ol samting olsem kakau, kopi, palmen i gat wel, raba, na ol kokonas.

Em i tok, dispela lukluk raun long Malaysia bai i helpim ol komiti long lainim ol gutpela we, bai ol i ken skulim ol fama bilong teritori, long ranim gut wok bisnis bilong ol.


OMO WASHES BRIGHT AS NEW!
PUT SOME BLUE OMO INTO A BOWL




OF HOT OR COLD WATER AND STIR




WASH YOUR CLOTHES IN OMO'S POWERFUL LATHER—AND SEE HOW CLEAN THEY GET




THROW AWAY DIRTY WATER...



THEN RINSE CLOTHES IN CLEAN WATER



SEE HOW CLEAN AND BRIGHT YOUR CLOTHES ARE WASHED WITH BLUE OMO!



EZ 1097.

MUN O GAS BI

STORI BILONG RET KROS

Ret Kros em i wanem samting?

Planti pipel tumas long Teritori i ting Ret Kros (Red Cross) em i wanpela han bilong Dipatmen ov Helt bilong gavman. Nogat tru. Ret Kros em i wanpela asosiesen bilong em yet. I no samting bilong gavman.

Asosiesen bilong Ret Kros long Papua New Guinea em i wanpela han bilong Ret Kros bilong Australia. As ples tru bilong olgeta 114 asosiesen bilong Ret Kros long graun, em i long taun Geneva long kantri Switzerland. I gat samting olsem 200,000,000 manmeri bilong olgeta kantri i memba.

Ret Kros em i wanem samting?

Dispela asosiesen i stap long olgeta kantri bilong gran na em i wok bilong graun na em i wok long mekim gut long ol pipel - maski ol i bilong wanem misin, o bilong wanem kala, o bilong wanem kantri, o bilong wanem politikal pati.

Em hia sampela wok bilong dispela asosiesen: long dispela asosiesen: 1. Helpim ol man i bagarap long bikpela guria o paia o sik o pait. Taim bikpela sik influensa i pinisim planti man long Hailans, Ret Kros i salim olkain klos na blanket long helpim ol. Kol yet i bagarapim ol pinis.

2. Helpim ol pikinini i han nogut, lek nogut, aipas, na bun i tait. Long Port Moresby i gat wanpela haus bilong ol dispela kain pikinini. Ret Kros i givim kaikai long ol, lukautim ol, na

baim marasin bilong stretim sik bilong ol.

3. Welfe Sevis: Sapos guria o paia o haiwara i bagarapim haus bilong sampela man, Ret Kros i helpim ol long mani na long olkain samting bilong stretim bek haus na samting bilong ol.

4. Wok wantaim ol yangpela manmeri: Sampela ofisa bilong Ret Kros i save go long ol skul na ol senta na ol haus kibung na skulim ol sumatin long ol pasin bilong sindaun gut, bilong kamap lida, bilong helpim ol sikman, bilong samapim klos.

5. Helpim long blut. Bilong wanem Ret Kros i go nabaut kisim blut? Bikos planti taim man i bagarap o meri i karim pikinini na i lusim planti blut tumas. Sapos yumi no givim blut long ol, bai ol indai. Blut yumi ken kisim long ol arapela manmeri tasol. Blut bilong ol abus o animal samting i no inap. Na planti manmeri i gat planti blut tumas; olsem Ret Kros i save bungim ol dispela blut na putim i stap redi long bokis ais. Ating wanpela de dispela blut i ken helpim laip bilong yu yet. Olsem yu givim sampela na ol i ken putim i stap.

6. Wok bilong painim ol man i lus pinis. Sapos taim nogut i kamap long wanpela hap graun na planti man i lus, Ret Kros yet i save painim ol man i lus. Ret Kros i save go insait long hap bilong ol birua tu. Ret Kros i no gat sampela birua. Em wanpela tasol inap go long olgeta hap. Moa long pes 10.



Em hia tupela ofisa bilong Ret Kros i kisim blut wanpela man i laik givim bilong helpim man i laik lukim, em i kisim sut tasol long rop bilong em. Em liklik.



Sampela yangpela memba bilong Ret Kros bilong Kav senel Skul i wok long samapim sampela blanket. O hia bai Ret Kros i salim i go long ol Hailans long

ONG RET KROS



Miss Raka Peter bilong Pari klostu long Port Moresby i skulim wanpela yangpela boi long pasin bilong strongim ol bun bilong em. Sampela yangpela man olsem bun bilong ol i tait na ol i no inap wokabaut. Ret Kros i helpim ol.



Em sampela presen hia Ret Kros bai i tilim long ol sikman na tarangu i stap long haus sik, bai bel bilong ol i gut long taim bilong Krismas.



Sampela Ret Kros memba i tilim sampela gutpela buk long ol sikman long haus sik.



Dokta Prince i givim setifiket long wanpela meri i winim skul bilong helt pinis. Helt Edukesen Ofisa bilong ples, em Sista Ruth Rokam, i sanap namel.



Ret Kros i skulim mama bilong pikinini i lek nogut, long ol pasin bilong strongim lek, bai em inap wokabaut.

Ret Kros

Olgeta yia ol memba bilong Ret Kros na planti arapela manmeri tu i save bungim mani bilong mekim ol dispela gutpela wok. Ating planti manmeri i pilim pinis long laip bilong ol yet, ol gutpasin Ret Kros i save mekim. Olsem na ol i laik bekim liklik, na olsem ol i tromoim wan siling bilong ol.

Ret Kros i save kamapim olkain singsing, na piksa, na pilai, na resis, na danis bilong winim mani long helpim ol gutpela wok.

I no longtaim i go pinis na wanpela praimer skul i bungim ten dola long helpim ol tarangu long Pakistan. Bungim pinis, nau ol i longlong. Bai ol i salim mani i go long husat na em i ken kamap stret long han bilong ol man i sik long kolera? Asosiesen bilong Ret Kros tasol inap long givim mani bilong ol sumatin hia i go stret long ol sikman.

Olgeta manmeri inap long join long Asosiesen bilong Ret Kros.

Ret Kros i kamap long Papua New Guinea namba wan taim long 1939. Long taim bilong pait em i helpim planti manmeri i lusim ol samting long woa. Tasol ol Australia i go pinis; na Ret Kros tu i go.

Em i kirap bek long Teritori long yia 1951 long Port Moresby. Tude em i gat han bilong em long: Goroka, Kavieng, Kieta, Lae, Madang, Mt. Hagen, Wewak, Rabaul, na Milne Bay tu.

Ret Kros i strong long givim wok long ol lokal pipel insait long Asosiesen bilong en. Nau 13 Yuropian i holim wok long Ret Kros na 42 Papan na New Guinean.

Kirapim Nupela Woksap

Papua New Guinea Developmen Beng i bin tok orait long givim \$20,000 dola dinau mani long Mista Doug Sharpe. Long wanem em i laik kirapim wanpela nupela woksap long Mendi, Sauten Hailans.

Em i tok dispela woksap bai i gat tripela hap. Wanpela hap bilong wok mekanik, narapela hap bilong putim ol hap hap samting bilong ka taim ol i odaim, na wanpela bakstua.

Mista Doug Sharpe i ting olsem, dispela woksap bai i redi long pinis bilong mun Ogas, sapos ol i skruim wok long ol samting bilong bus tasol.

Senisim Memba

Namba tri ileksen bilong Haus Asembli bai i stat long namba 12 de bilong mun Februeri long yia bihain. Ol i ken vot long ol memba i go inap long namba 11 de bilong mun Mas.

Mista Simon Kaumi, hetman bilong bosim ol ileksen, i bin tokaut long ol dispela ripot. Em i tok gavman bilong Australia i bin tok orait long ol dispela de bilong ileksen na i wankain long ol ripot em ol komiti i bin mekim pinis long Haus Asembli.

Dispela ileksen i bilong senisim ol memba long Haus Asembli.

Sapas yu laik sanap long dispela ileksen, yu mas salim nem bilong yu pastaim long namba 12 de bilong mun Disemba.



Mista Timothy Mamsu, wanpela sumatin bilong St. Fidelis Koles long Madang, i painim wanpela liklik pikinini meri i trip i stap antap long solwara. Em i kalap i go daun, pulim pikinini i kam sua na rausim wara long waitlewa bilong en. Bihain liklik na pikinini meri i kirap pulim win isi isi. Nau em i stap gut. Long piksa yu lukim pikinini meri wantaim mama bilong en na Timothy Mamsu. Long dispe-la taim Timothy i wokabaut raun bilong kisim sensus, o kaunim ol man.

Tingting Bilong Ol Bisop

Long mun Julai ol 18 bisop bilong ol katolik i kibung long Port Moresby inap wanpela wik olgeta. Em hia sampela tingting bilong ol:

1. Namba wan wari bilong ol bisop em i pasin bilong spak na dring tumas i krungutim na daunim ol pipel bilong Papua New Guinea. Ol i go longlong nau long dring tasol. Liklik taim bai kantri i bagarap tru. Ol waitman, na olgeta manmeri i wok long ol misin i mas go pas soim gutpela rot, i mas givim gutpela eksampel. Sampela man i no gat strong i mas tambu olgeta long dring.

2. Ol bisop i laik askim Pop Pol bai sampela moa blakskin bisop i kamap long Papua New Guinea. Eklesia o sios hia em i mas sios bilong ol Papua New Guinea yet; i mas gat moa long ol


wanskin i bosim ol man insait long sios.

3. Wanpela Tolai, Pater G. Bata bilong Rabaul, bai i go long Rom sindaun kibung wantaim ol bisop bilong graun long mun Oktoba. Pater Bata i save tumas long tingting bilong ol wari na tingting bilong ol lokal pris bilong yumi. Olsem em i olsem maus bilong ol.


4. Ol bisop i belgut long nupela pasin i kamap long kantri bilong yumi, em pasin bilong olgeta lotu i sindaun gut na wok gut wantaim. Ol lotu i no ken pait na resis wantaim, bai kantri i bruk bruk nabaut.

5. Nupela bisop katolik bilong Papua Bisop Louis Vangeke, bai i memba bilong komiti bilong bosim bikpela seminari long Bomana. Pater Francis Misso bilong Manus, em tu i memba.

n i Gat Wel



Mista Pita Simogun i sindaun wantaim Mista Barnes, Minista bilong ol Teritori.



Wanpela nupela fama wantaim namba wan mekpas pikinini bilong diwai ol i kolim wel pam. Nau ol i redi long go long faktori, bai ol i wilwilim na wel i kamap.



Tupela fama i stap long wel pam gaden bilong ol bihain ol i opim faktori pinis.



Dispela ston bilong makim nupela wok i gat dispela tok antap long en: Dispela ston i makim de, 14 Julai 1971, taim Mista Barnes, Minista bilong ol Teritori, i opim Mosa Wel Faktori namba wan taim.




Minista bilong ol Teritori, Mista Barnes, i rausim plak long wanpela ston i makim nupela wok i kamap.



Piksa long Iephan: Saiden Nicholas Augwi wantaim pikinini bilong em Andrew. Tupela i amamas long namba tu sta Saiden i bin kisim. Wanpela sta em i min tenpela yia sevis insait long lain plisman. Olsem Saiden Augwi i gat tupela nau, em i winim 20 yia pinis. Ol i makim em pinis long 1953 long go long London na sambai taim kwin i kisim namba bilong em. Plismasta Inspekta Rae bilong Wewak, i tok ol yangpela plisman i ken bihainim gutpela pasin bilong Saiden Augwi; em oltaim i mekim gutpela wok na givim gutpela nem long ol plisman.

Saun bilong **SANYO** gutpela tumas



Sanyo i ken mekim yu makim draipela redio, stat long 8 transista i go kamap draipela samting tru em inap long kisim stesin long we. **Wonem kain samting yu laikem long harim, Sanyo i gat.**

Soim istap antap emi piksa bilong 11XA853. Emi namba wan 10 transista redio bilong harim tok long olgeta graun. Long han rait emi 8 transista redio ino hevi na isi gutpela redio em bai klia saun sapos yu kisim long we stesin.

**LUKIM SANYO
ISTAP LONG STUA
LONG HAP. BILONG YU**



BRECKWOLDT & CO. (N.G.) PTY. LTD.

Port Moresby,
Box 1549,
Boroko.

Madang,
Box 185.

Lae,
Box 557.

Rabaul,
Box 222.

Mt Hagen,
Box 237.

Wewak,
Box 178.

Kieta,
Box 72

Taitim Bun

Taim em i kam opim nupela wok wel, pam long Hoskins, Mista Barnes, Minista bilong ol Teritori, i go lukim Manus Ailan namba wan taim.

Em i tokim ol lokal gayman kaunsila bilong Manus, olgeta taim em i kam long New Guinea, ol pipel i save singaut long moa moa mani bilong helpim kantri i go het. Oltaim ol i laikim moa haus sik, moa skul, moa ples balus.

Em i gutpela. Tasol yupela ol kaunsila i mas save, yupela i mas winim mani bilong yupela long graun bilong yupela yet. I gat planti tumas hap graun long New Guinea i karamap tasol long bus. Yupela i laikim mani, orait, yupela i taitim bun, bungim strong na save bilong yupela, na mekim planti kopra na kakau i kamap.

Yupela i no ken sutim tok long ol man na skelim ol olsem jas. Nogut bai God i mekim olsem long yupela. (Luk 6,37)



world news


apollo 15 blasts off

America's Apollo 15 blasted off into space last week carrying astronauts David Scott, Alfred Worden and James Irwin off to what will be man's third landing on the moon.

Scott and Irwin will make the exploration of the moon's surface while Worden will orbit the moon in the command ship Endeavour - named after the ship used in Captain Cook's scientific voyage 200 years ago.

Scott and Irwin will travel 22 miles over the moon's surface in the 'moon buggy' to collect rock and mineral samples.

Apollo 15 will cost almost \$400 million which is \$39 million more than Apollo 14.



nixon to visit china


This week the President of the United States, Richard Nixon announced that he would go to China to meet with Chairman Mao and China's premier Chou En-lai.

He is the first American president ever to visit the Chinese head of government.

President Nixon hopes to discuss world peace with Chairman Mao, especially such points as the Viet Nam War and American relationships with China.

China is the third largest country in the world. It covers over three and a half million square miles and the population is over 750 million people.

China is ruled by a Communist government from the capital Peking and the chairman or leader of the Communist party is Mao Tse-tung, one of the most politically powerful men in the world.



Richard Nixon - first U.S. President to visit China.

The chief exports of China are rice, wheat, corn and cotton. China has the world's second largest vegetable crop.

The farmers collect animal manure and human waste and use it as fertilizer. Nearly half of China's farmland is irrigated - water flows to the farmland through a system of canals from rivers and lakes.

Many languages are spoken throughout China. As in New Guinea, a single village may have it's own 'tok ples' which is not understood by other villages.

KRISTEN PRES i wokim kain kain buk bilong strongim bilip na bilong sanapim gutpela pasin na sindaun na bel isi bilong ol manmeri na ol pikinini.

Nau yu ken baim dispela buk:

Sotpela Lotu Bilong Helpim Yumi, Buk 3

Dispela buk i gat 65 sotpela lotu bilong sampela tok i stap long Nupela Testamen. Sampela tisa i wokim planti gutpela tok bilong skul na famili na kongrigesen.

Salim oda i go long:



KRISTEN PRES


Sales Division
The Christian Book Centre
Box 222, Madang



Premier Chou En lai (small picture) and Chairman Mao, one of the world's most powerful men.

Mao has been head of Communist China since 1949.

Autim Tok



O yes, ol wantok bilong mi, em hia wanpela bikpela wari mi laik autim long yupela olgeta manmeri. Em i wanpela bikpela samting tru. Mi pret sapos yumi no stretim dispela samting kwiktaim, bai long taim bilong independens yumi painim bikpela trabel. Mi tok long wanem trabel? Mi tok long ol dispela tingting na tok bilong planti man bilong rausim ol Saina long taim bilong independens. Planti ol lokal pipel i ting olsem: Ol Saina i no save helpim kantri bilong yumi liklik. Ol i save pulim mani bilong ol man na ol i no tingting liklik long helpim New Guinea. Ol i save

salim ol mani bilong ol i go nabaut long Australia o ples bilong ol na ol i no save kamapim wanpela gutpela samting hia long New Guinea olsem ol Australia. Yu lukim. Ol i no save go insait tru long komuniti bilong yumi na sindaun wantaim yumi ol arapela man na toktok long painim rot bilong helpim kantri. Nogat. Planti ol i no save wokim gutpela stua o ples bisnis bilong ol. Ol save wokim rabis haus na ol win mani bilong bisnis bilong ol i aut pinis long New Guinea. I luk olsem ol i no ting, "Mipela man bilong New Guinea. Mipela mas wok wantaim ol bilong kamapim kantri".

Ol i ting, "Mipela mas hat wok long painim mani hia long New Guinea bai bihain mipela ken sindaun gut long narapela ples.

Long dispela samting yumi planti man i kros na mi pilim bikpela trabel bai i kamap. Bilong wanem trabel i kamap? Bikos New Guinea em i wanpela yangpela kantri. I no gat planti mani o we bilong painim mani bilong helpim sindaun bilong yumi. Na sapos wanpela lain man i kam insait long kantri na wok long pulim mani orait dispela kain pasin i kamapim trabel tasol.

Narapela samting tu. Mipela lukim long taim bilong ileksen. Planti ol Saina ol i no save go long vot. I no gat wanpela long Moresby, Lae o Madang i sanap long Taun Kaunsil. Dispela kain i mekim pen tru bel bilong ol man.

Olsem tingting bilong yumi ol YC lida i olsem. I gat tupela rong i kamap pinis. Wanpela rong bilong ol Saina, na wan-


pela rong bilong ol man bilong New Guinea. Rong bilong ol Saina i olsem: lain bilong ol ol i no tingting liklik long kantri bilong yumi. Rong bilong ol man bilong New Guinea i olsem. Longtaim ol i pilim dispela trabel, tasol ol i no laik autim klia bai ol man i ken save.

Mipela autim tok pinis. I no samting bilong kros o pait. Em i samting bilong stretim. Nogut tok i hait long bel bilong ol na bihain i gat bikpela kros. Mobata yumi olgeta i sindaun olsem wan kantri, wan pipel.


TOK SAVE

Mipela long Niuspepa WANTOK i laik bihainim lo bilong Haus Asembli, olsem na mipela oltaim i kolim kantri bilong yumi olsem: Papua New Guinea. Olsem tasol ol i raitim pinis long pepa bilong gavman, ol i kolim "Government Gazette".


SUNLIGHT SOAP WASHES VERY CLEAN AND WASHES ALL THE DIRT AWAY.




PUT THE DIRTY CLOTHES IN A BASIN OF WATER.




RUB THE CLOTHES WITH GOOD, PURE SUNLIGHT.



WASH THE CLOTHES IN THE WATER THEN TIP THE DIRTY WATER OUT.



RINSE THE CLOTHES IN CLEAN WATER



LOOK! SUNLIGHT HAS WASHED ALL THE DIRT AWAY! USE SUNLIGHT SOAP FOR ALL YOUR WASHING.



Kaunsil Nius

Nu Ailan

Sentral Kaunsil bilong Nu Ailan i gat planti nius moa. Ol i wokim niuspepa bilong ol stret i pulap long nius bilong ol wok bilong kaunsil. Nem bilong niuspepa **MALANGAN.**

Ol i gat namba wan kuskus bilong ol, na em i no bilong Nu Ailan, em i bilong Rabaul. Nem bilong em Mista Joseph Toliman. Mista Toliman i kisim pinis bikpela skul long kuskus na bipo em i holim dispela wok long Nakanai Kaunsil inap 2-pela yia samting.

(Em i gutpela pasin i gat man insait long ol kaunsil ol i bilong narapela ples, tasol ol i bin kisim gutpela namba namel long ol man bilong narapela ples. Yumi ken painim olsem long Madang na long Hailans. Em i gutpela tru; pasin olsem i bungim New Guinea na i mekim kamap wanpela kantri, wanpela pipel.)

Kaunsil hia i gat tupela haus slip na wanpela haus kibung. Man i laik yusim dispela ol haus, em i mas baim kuskus. Em i mas tromoim \$2.50 long wanpela san o wanpela nait bilong haus slip; na \$10.00 bilong yusim haus kibung.

I gat wanpela miting bilong ol Et Pos Odeli wantaim ol kaunsila, long wanem long dispela hap ol odeli hia ol i aninit long kaunsil. Kaunsil i save baim wok bilong ol. I gat 12-pela odeli olgeta i kamap. Ol i toktok long wok bilong ol. Dokta Toua i skulim ol na i tok ol i mas wok inap 8 aua olgeta de. Tasol sapos wanpela man i gat sik na i kamap long biknait o long taim bilong malolo, odeli mas givim marasin long em.

Long miting bilong

kaunsil planti kaunsila i tok ol man bilong ples i laik kaunsil yet i baim haus paiaman na pik waia samting. Tasol kaunsil i tok, em i no inap helpim ol bisnis, na mani bilong en i sot tu.

Niuspepa bilong kaunsil tu i laik mekim klia tok bilong ol nupela lo bilong graun. Las taim mipela i bin raitim long WANTOK ol dispela nupela tingting long husat i papa bilong graun, olsem wanem man i mas raitim nem bilong en na mak bilong graun long buk bilong gavman.

Niuspepa bilong kaunsil, **MALANGAN,** i gat sampela pas tu ol man i raitim. Em i gutpela pasin tru. I gut planti kaunsil i mekim wankain bai planti man bilong New Guinea i ken save long tingting bilong ol arapela man.

Goroka

Tripela lokal gavman kaunsil i hatwok tru long stretim olgeta rot long hap bilong ol. Em hia: Goroka kaunsil na Henganofi kaunsil na Asaro-Watabung kaunsil.

Goroka kaunsil i gat wanpela buldok bilong mekim bikpela wok long ol rot klostu long Bena. Henganofi kaunsil i gat 3-pela trakta.

Lae

Kaunsil hia i hop long kisim planti profit mani long bikpela haus tambaran bilong en. Wanpela kampani i takis \$10,000 long kaunsil olgeta yia long yusim dispela haus

helpim samting olsem 7,000 pipel i stap long hapsait bilong Bumbu Riva.

Bai i gat 2-pela nes na 2-pela odeli i wok long dispela liklik haus sik na bihain bai ol kaunsil i baim ol yet. Nau Dipatmen ov Helt i givim pe long ol yet.

Nau ol mama na pikinini no mas wokabaut longwe long go long haus sik long Lae.

Rabaul

Em i namba wan taim ol i gat ileksen long Ramoiana Lokal Gavman Kaunsil long Duk ov Yok Ailans. Bai dispela 7-pela ailan i vot: Molot, Mioko Palpal, Mualim, Maren, Kababiai, na Butlivuan. Mista P.J. Fenton, lokal gavman ofisa, na Mista Urban ToGavul, helpman bilong em - tupela i bosim ileksen.

Kieta

Lokal gaman kaunsil i wari moa long planti man tumas i kamap long Bougainville, i no painim wok, na ol i raun nabaut mekim trabel tasol. Ol i laikim Haus Asembli i wokim wanpela lo bilong salim ol dispela kain man i go bek long ples bilong ol.

Angoram (Sepik)

Dipatmen ov Helt na Huon Lokal Gavman Kaunsil tupela wantaim i wokim wanpela nupela helt senta long butibumviles. Tupela wantaim i bungim \$4,000 bilong dispela wok. Dispela senta o klinik bai i

tambaran olsem stua bilong salim olkain kaving samting.

Kaunsil hia bai i tromoim \$5,000 long stretim rot i lusim Timbunke i go long Chimbian. Ol man arere long rot bai i givim \$6,000.

Kaunsil hia bai kisim \$10,000 dinau long Rural Developmen Beng. Samting olsem \$1,000 bai i go long stretim rot i lusim Angoram i go long Kaup; na narapela \$1,000 bilong rot i lusim Mondumundu i go long Urimo.

Angoram Kaunsil bai wokim 3-pela haus tisa inap \$4,700; 3-pela et pos inap \$2,700; na i laik baim wanpela pang inap long \$5,200 bai ol inap karim ol trak na bulmakau na rais na arapela samting antap long wara Sepik.

Port Moresby

Bai ol i kamapim wanpela nupela lokal gavman kaunsil long ples Kuni insait long lain bilong ol Papua long hap bilong Bakoudu na Kubuna. Ol man bilong dispela tupela ples i kamdaun pinis long ol maunten bilong ol na ol i kirapim bisnis bilong raba o gumi na bilong wok bulmakau.

KLASIFAIT

PABLIK NOTIS

YU SAVE gutpela rot long wokabaut bilong yumi long olgeta de? Sapos yu laik kisim nating dispela buk, salim pas long Booklet, Box 1096, Boroko.

Wantok Publications
P.O. Box 298, Wewak, i wokim, na Wirui Pres long Wewak i prinim.



Olgeta piksa long dispela pes i bilong guria i kamap long Rabaul.